



## NAVOIY VILOYATI KONIMEX TUMANI HOKIMINING QARORI

2025-yil 23-may

98-5-70-Q/25

Konimex tuman hokimiligi

### **O‘zbekiston Respublikasi Vazirlar Mahkamasining 2025-yil 8-maydagi “Hududlarda mikrosanoat markazlari faoliyatini tashkil etish chora-tadbirlari to‘g‘risida”gi 308-sonli qarori ijrosini ta‘minlash haqida**

O‘zbekiston Respublikasi Prezidentining 2025-yil 17-yanvardagi “2025 yilda aholi bandligini ta‘minlash va kambag‘allikni qisqartirish chora-tadbirlari to‘g‘risida”gi PQ-12-son qarori ijrosini ta‘minlash maqsadida

#### **QAROR QILAMAN:**

1. O‘zbekiston Respublikasi Vazirlar Mahkamasining 2025-yil 8-maydagi “Hududlarda mikrosanoat markazlari faoliyatini tashkil etish chora-tadbirlari to‘g‘risida”gi 308-sonli va viloyat hokimining 2025 yil 20 maydagi 111-5-0-Q/25-sonli qarorlari ijro uchun qabul qilinsin.

2. O‘zbekiston Respublikasi Prezidentining 2025-yil 17-yanvardagi “2025-yilda aholi bandligini ta‘minlash va kambag‘allikni qisqartirish chora-tadbirlari to‘g‘risida”gi PQ-12-son qaroriga muvofiq 2025-2026-yillarda viloyatda mikrosanoat markazlarini (keyingi o‘rinlarda - Mikrosanoat markazlari) barpo etish loyihalarining manzilli ro‘yxati tasdiqlangani ma‘lumot uchun qabul qilinsin.

3. Vazirlar Mahkamasining 2025-yil 8-maydagi “Hududlarda mikrosanoat markazlari faoliyatini tashkil etish chora-tadbirlari to‘g‘risida”gi 308-sonli qarori bilan quyidagilar belgilab qo‘yilganligi inobatga olinsin:

Mikrosanoat markazlari hududlarning ixtisoslashuvi va tadbirkorlik an‘analarini (hududlarning drayveri), yuqori daromadli ish o‘rinlarini yaratishni, shuningdek, xorijiy davlatlar (Xitoy, Janubiy Koreya, Turkiya) tajribasi asosida qurish inobatga olingan holda ishlab chiqiladigan alohida konsepsiyaga muvofiq barpo etiladi;

Mikrosanoat markazlarida hunarmandchilik, tikuvchilik, poyabzalchilik, qandolatchilik va boshqa tadbirkorlik faoliyati turlari bilan shug‘ullanadigan kichik va o‘rta tadbirkorlik subektlari (keyingi o‘rinlarda - tadbirkorlik subektlari) joylashtiriladi;

Mikrosanoat markazlariga ishlab chiqarishlarni joylashtirishda tabiiy gazga muqobil bo‘lgan yoqilg‘i turlaridan va energiya tejamkor texnologiyalardan (geliokollektor, issiqlik nasosi, quyosh panellari, issiqlikni qayta tiklash-rekuperatsiya qilish va boshqalar) foydalanishga ustuvorlik beriladi;

Mikrosanoat markazlarining loyiha konsepsiyasi Bandlikka ko‘maklashish davlat jamg‘armasi mablag‘lari hisobidan O‘zbekiston Respublikasi Kambag‘allikni qisqartirish va bandlik vazirligi tomonidan loyiha tashkilotlarini jalb qilish orqali ishlab chiqiladi va tasdiqlanadi;

Mikrosanoat markazlarini qurish uchun yer uchastkalari tasdiqlangan loyiha konsepsiyasi asosida ishlab chiqarish bino va inshootlarini tayyor holda qurish va keyinchalik ularga tadbirkorlik subektlarini joylashtirish uchun tashabbuskor pudrat tashkilotlariga elektron onlayn-auksion savdolari orqali sotiladi;

elektron onlayn-auksion savdolari O‘zbekiston Respublikasi Prezidentining 2025-yil 17-yanvardagi PQ-12-son qarori bilan tasdiqlangan 2025-2026-yillarda Qoraqalpog‘iston Respublikasi, viloyatlar va Toshkent shahrida mikrosanoat markazlarini barpo etish loyihalarining manzilli ro‘yxati asosida o‘tkaziladi;

elektron onlayn-auksion savdolari g‘olibi bo‘lgan pudrat tashkilotlari bilan O‘zbekiston Respublikasi Kambag‘allikni qisqartirish va bandlik vazirligi hamda tuman (shahar) hokimliklari o‘rtasida Mikrosanoat markazlarini tasdiqlangan loyiha konsepsiyasi asosida qurish va ularga tadbirkorlik subektlarini joylashtirish shartlari (ijaraga (lizingga) berish, kredit, to‘liq yoki bo‘lib-bo‘lib to‘lash orqali sotish) to‘g‘risida uch tomonlama bitim tuziladi;

Mikrosanoat markazlarida yaratiladigan ishlab chiqarish maydonlari tadbirkorlik subektlariga pudrat tashkilotlari tomonidan uch tomonlama bitimda ko‘rsatilgan shartlar asosida taklif etiladi;

Mikrosanoat markazlarini muhandislik-kommunikatsiya infratuzilmasi bilan ta‘minlash bo‘yicha xarajatlar mahalliy byudjetlarning qo‘shimcha manbalari, shu jumladan, mahalliy byudjetlarga ushbu qarorga muvofiq yerlarni elektron onlayn-auksion savdolari orqali sotishdan tushgan mablag‘lar va qonunchilikda taqiqlanmagan boshqa manbalar hisobidan amalga oshiriladi.

4. Tumanda mikrosanoat markazlarini barpo etish hamda ularga kichik va o‘rta tadbirkorlik sub’ektlarini joylashtirish bo‘yicha ishchi guruh tarkibi (keyingi o‘rinlarda - ishchi guruhi) ilovaga muvofiq tasdiqlansin.

Ishchi guruhining asosiy vazifalari etib quyidagilar belgilansin:

O‘zbekiston Respublikasi Prezidentining “2025-yilda aholi bandligini ta‘minlash va kambag‘allikni qisqartirish chora-tadbirlari to‘g‘risida” 2025-yil 17-yanvardagi PQ-12-son qaroriga muvofiq mikrosanoat markazlarini barpo etish uchun belgilangan hududlardan tuman (shahar) hokimliklari zaxirasidagi qishloq xo‘jaligiga mo‘ljallanmagan bo‘sh yer uchastkalarini (keyingi o‘rinlarda — yer uchastkalari) tanlash;

Mikrosanoat markazlarini loyiha konsepsiyasi asosida qurish uchun tanlangan yer uchastkalarining belgilangan tartibda elektron onlayn-auksion savdolariga chiqarilishini tashkil etish;

Mikrosanoat markazlari pudrat tashkilotlari tomonidan belgilangan muddatlarda qurilishi ustidan doimiy monitoring yuritish;

Mikrosanoat markazlariga tadbirkorlik sub’ektlarini joylashtirish va ularning faoliyatini tashkil etishda yordam ko‘rsatish;

Mikrosanoat markazlarini barpo etish loyihalari doirasida yangi ish o‘rinlari yaratilishini nazorat qilish.

5. Tuman hokimining birinchi o‘rinbosari v.v.b(E.Hazratqulov), “Agrobank” tuman filiali (M.Xamrayeva), Kambag‘allikni qisqartirish va bandlik bo‘limi (K.Xudayberganov) tegishli tashkilotlar bilan birgalikda:

Mikrosanoat markaziga tadbirkorlarni jalb qilish, ularning biznes-rejalari asosida yangi loyihalarni ishlab chiqish, loyihalarga tijorat banklari tomonidan kredit ajratish va loyihalarni amalga oshirishda ko‘maklashish;

mahalla banklari orqali bank xizmatlarini targ‘ib qilish, tadbirkorlarni moliyaviy qo‘llab-quvvatlash va yangi mijozlarni jalb qilish;

Mikrosanoat markazining ixtisoslashuvi va shart-sharoitlaridan kelib chiqib, boshqa hududlardagi ijobiy tajribalarni ommalashtirish choralarini ko‘rsin.

6. Tuman hokimining birinchi o‘rinbosari v.v.b(E.Hazratqulov) Mikrosanoat markazining loyiha konsepsiyasi tasdiqlanganidan so‘ng:

manfaatdor korxonalar va tashkilotlar bilan birgalikda Mikrosanoat markazini loyiha konsepsiyasi asosida qurish uchun tanlangan yer uchastkalarining belgilangan tartibda elektron onlayn-auksion savdolariga chiqarilishini ta‘minlasin. Bunda elektron onlayn-auksion savdolari ishchi guruhi xulosasiga asosan salohiyatli pudrat tashkilotlari o‘rtasida yopiq shaklda o‘tkazilishi mumkin.

Qurilish va uy-joy kommunal xo‘jaligi sohasida nazorat qilish inspeksiyasi bilan birgalikda Mikrosanoat markazida bajariladigan qurilish-montaj ishlarining sifati ustidan davlat arxitektura-qurilish nazorati o‘rnatilishini ta‘minlasin.

7. Tuman hokimining birinchi o‘rinbosari v.v.b (E.Hazratqulov), Kambag‘allikni qisqartirish va bandlik bo‘limi (K.Xudayberganov) 2025-yil yakuniga qadar tegishli tashkilotlar bilan birgalikda aholini daromadli mehnat bilan ta‘minlash dasturlari doirasida mikrosanoat markazini barpo etish loyihalarini yanada kengaytirish bo‘yicha takliflarni viloyat hokimligiga kiritin.

8. Mazkur qarorning bajarilishini nazorat qilish tuman hokimining birinchi o‘rinbosari - iqtisodiyot va moliya bo‘limi boshlig‘i v.v.b E.Hazratqulov hamda tuman Kambag‘allikni qisqartirish va bandlik bo‘limi boshlig‘i K.Xudayberganov zimmasiga yuklansin.

**Konimex tumani hokimi**



**Ro‘ziyev R.N**